

兩朝從信錄

大局大勢
大利大害
詳列指顧
而名號也

兩朝從信錄卷之七

秀水

沈國元述

六月

吏科倪思輝奏曰。痛自遼瀋繼陷。

祖宗二百五十年開拓之封疆。淪于左衽。忠臣義士恨不
剪滅朝食。而無奈畏怯之餘。人心振恐。不得不暫議守以
爲恢復之圖。顧守亦未易言也。三岔河一衣帶之險。我旣
與賊共。而廣寧彈丸之地。夷與虜又交相垂涎其間。則勢
不得不羈縻西虜。以緩河上之師。脩備禦之具。此雖秣馬
厲兵。枕戈待旦。恐有意外之虞。而何塘報稍緩。議論又紛。

大臣憂譏畏譏之意多。而擔當國事之念少。平章者不聞有謀斷之資。而徒推諉于

題復。筦樞者不聞有帷幄之籌。而徒卸擔于會議。少旌蒲輪負天下之望。而躋

聖明之朝者。不聞有扶危定傾。補天浴日之經綸。而徒浮沉于時局。夫既以身任天下之重。焉得一去以明高。既受主上之深恩。又焉得托病以解免。奈何數日以來。閣臣劉一燝。杜門矣。冢臣周計臣。李刑臣。黃禮臣。周俱紛紛註籍求去矣。刑部侍郎鄒元標。左僉都御史王德完。皆昔所稱人望者。而入朝未幾。歸念頓生矣。果爾空人之國。自貽

伊戚清夜以思。邊檄星馳而起。秋風葦蘆之興也。安乎不
安乎。

冲聖當陽。諫行言聽。請官則官。請廢則廢。請發帑則發帑。
真可爲堯舜之

君也。方賴老成夙望。輔養

睿德。鎮定人心。卽微有規正。亦春秋責備賢者之意。倘或
借此懷綠野之思。而空寶山之手。恐使

聖主之孤立。不顧家國之安危。勿論辜恩負

主。大非夙昔而試質出處之大義。不知諸臣何所見而來。
何所見而去也。方今戎馬生郊。用人最急。而延挨日時。三

岔河之墩堡不設兵將不備山海一帶議添錢糧不聞作何應給薊門一帶隘口不聞作何布置天津登萊一帶不聞募水兵作何操脩都城防禦不聞作何料理徐光啟以遼變召還矣即如建敵臺一事尚未起手將何以展其經濟也李之藻以管理軍器加升矣而十六門之火藥戰器曾幾修造將何以責其成功也畢茂康以知兵留用矣事權未假措手無由當作何着落而獲其實用也今皇上因遼東之急詔起熊廷弼恨不立至眼前殲厥醜類頃聞廷弼叱馭而前輕千里而赴難已干上谷矣壯哉但銓衡堅卧人情皇皇恐如前者用三臣之套數伏乞

皇上軫念封疆採通國之議勅冢臣速出視事立題廷
躬經略山海恢復遼陽之事一以委之借其平日之威名
用寒逆賊之心膽而爲廷躬者亦宜與文球王化貞張應
吾同心戮力密切商量並捐爾我之私急圖安攘之績外
禦虜而護神京庶不負

朝廷簡用之恩而社稷有所托也如曰虜騎未必渡河而
款虜便爲長策習處堂之故態忘漏舟之禡襴議事如築
舍用人如奕棋恐東夷出假道之奇而西虜收漁人之利
異日之憂反不在夷而在虜也願爲化貞者款不忘備如
郭汾陽之盟回紇而拒吐蕃以作廣寧長城之倚爲廷躬

規經臣

規議行諸臣

規開部大臣

減加派

復行取

者勞而能謙如諸葛武侯之集衆思廣衆益以收尅復河
河東之功而在

廷臣言事者虛心建議勿再牽纏于異同之積習當事者
實心荷肩勿徒侈張于帝上之條陳開部大臣受

顧命被簡召者當挺樹風節打起精神力排弃地媚虜之
議堅持澶淵淮蔡之功默釀人心世道之和發舒直節敢
諫之氣則不動聲色而作用固已遠矣昔中園相司馬而
四夷相戒不敢犯邊豈異人任又安在斥逐言官以立威
爭字句以見奇也矧今兵荒相仍盜賊竊發則當急減加
派收拾人心貪墨成風賢能淹滯當急復行取以鼓舞循

選將

兵

時弊之
人者

吏選將選其才而一割之粗豪未可遽當登壇之重任練
兵練其膽而甲兵之堅利即壯三軍之前茅頃聞京營一
缺鑽營甚衆萬一用非其人則害非小斷不可草草從事
也此時速逮守土之逃官急削病贖之經畧屏禁地之孽
璫正辱

國喪師之典刑自然紀綱振肅而戰勝

廟堂矣區區小酋何足道哉頃南科臣汪應蛟籌邊八議
志誠憂

君憂國當事者採而行之未必非救時一助也職愚不識
忌諱言事伏惟

聖明大奮乾剛速

賜允行天下幸甚國家幸甚

敕統兵官毋許援兵譁擾地方有司務宜處置得法

大學士何宗彥入閣辦事

雨降自冬及春歲輔久旱

皇上宮中虔禱素服

御門

勅百官同加修省夜半甘雨千里

恩廕輔臣劉一燝韓爌各一子尚寶司丞并給新銜少保

兼太子太保進武英殿大學士改吏部尚書誥命

戶部尚書李汝華致仕

御史丘兆麟樞政料理宜新疏曰前者兵餉并患而今遼疆大半失陷則遼餉亦大半減免只今試一會所入之數無論加派無論內帑即舊額九十餘萬所餘爲八萬兵之用今可全用之廣寧大司農當自可不患夫今所患惟兵而已今之所料理惟大司馬而已兵之所取不從天來不從地出惟有兩言而決調焉募焉而已今九邊之備處處皆弱可調不可調未見叅酌今募兵之使或先言用或既言不用或先言去或既言不去可募不募亦未見處分然則兵可以不調可以不募乎新司馬熟悉邊事自可一言

決。山。陝。宜。大。之。調。徵。新。御。史。有。可。自。愛。之。身。名。必。不。肯。同。
 棘。門。漸。上。之。兒。戲。若。是。者。叅。酌。處。分。固。可。坐。而。定。而。未。宜。
 猶。豫。也。至。于。兵。之。調。募。有。成。議。矣。用。之。何。處。亦。只。兩。言。而。
 決。數。日。而。定。策。應。廣。寧。爲。第。一。策。應。登。萊。爲。第。二。策。應。山。
 海。京。師。爲。第。三。策。今。且。專。言。廣。寧。出。關。之。兵。苦。干。未。見。實。
 數。設。防。三。岔。河。黃。泥。窪。築。臺。掘。溝。未。見。實。用。新。撫。臺。沉。勇。
 勇。等。邊。實。心。做。事。方。不。欲。過。爲。張。皇。而。裡。面。人。遂。以。爲。可。
 幸。無。事。應。之。以。緩。而。肩。之。以。徐。塘。報。急。則。急。塘。報。緩。則。緩。
 然。則。廣。寧。遂。真。棄。乎。鏡。前。人。之。所。以。失。則。當。圖。今。人。之。所。
 以。得。我。爲。事。中。之。人。分。之。他。人。不。得。則。痛。癢。惟。我。自。覺。代。

之他人亦不得則痛癢惟我自搔何以報君父在竭忠赤
何以責議論在砥躬行濟變與其用智寧用愚爭勝與其
用躁寧用恬精神詳用之看朝報不若詳用之看塘報機
智妙用之測人情不若妙用之測軍情意念常用之防官
爵之壞不若常用之防封疆之壞凡此皆新樞臣所饒爲
而臣姑贅言之以效他山之石

浙江巡撫蘇茂相遵

詔舉遺直聞忠貞以備起用卹錄

恩詔開一建言廢棄并礦稅註誤諸臣已奉

遺詔酌量起用其有事關國本抗言得罪降斥謫戍永錮

牛字是

水部實錄

功在社稷

獨處志懷

未易量數

眼前名位

何足云

終身吏部作速查開職名分別奏請召用卹錄看得原
任都水司郎中岳元聲正氣充塞兩間直道遠追三代力
排並封之議

宗社賴以獲安獨斥東封之非疆場籍以底定惟骨鯁而
道難合故身退而名益高既有功于國家宜亟登之廊廟

又看得已故原任南康府知府吳寶秀孤忠揭日月節凌
霜丹書七年徒與累囚對泣黃堂兩月頗遭稅使含沙被

逮幸爾生還抱憤溢焉冤切封妻陳孺人烈凜冰霜貞堅
金石傷心桎梏欲詣闕以鳴冤痛切析楊竟投繯而立

盡忠臣殉國烈婦殉夫萃美一門照耀千古應旌表卹錄

學

以勵世風、據司府呈請前來、相應具題、伏乞

勅下該部、再加查議、覆請施行、

禮臣奏曰、竊惟勸學作文、乃

帝王之盛舉、崇儒重道、實風化之先圖、我

太祖高皇帝、首建大禮、加禮師儒功高百王、法垂萬世、嗣後

列祖紹基、無不臨幸、

世宗肅皇帝、享國長久、誕敷文教、再臨幸焉、茲者恭遇

皇上丕贊洪圖、聿新丕烈、宜修文德、追兩階之舞、用襄武事、神九伐之威、矧鄉閭試士之秋、正豪傑觀光之日、釋奠

孔子昭師道之尊預

勅辟雍。垂作人之訓。于斯爲盛。寧可後時。臣等遵制具題
伏乞

皇上勅下本部行欽天監擇日及會同翰林院將合行禮
儀擬議上

請舉行斯世斯文。不勝幸甚。

大學士朱國祚同知經筵

鄉試主考浙江編修錢謙益、刑科暴謙貞、江西編修周延
儒、戶科土繼曾、湖廣簡討繆昌期、工科朱童蒙、陝西吏部
主事唐順、戶科主事趙嗣芳

初九開館纂修

神宗 光宗

實錄始

禮部奏復奉聖夫人客氏無例可加恩典、

上曰、加恩旣云無例、爾部所存、是何典故、所載 累朝常例、備寫來看、併此亦無、只是典章不存、不是無例、仍行各衙門備查、或如照別項

恩例推廣具奏、

禮部以辛酉爲

龍飛首科、乞照隆慶四年例、加兩雍中額、擬于皿字號內順天暫加十五名、應天五名、後不爲例、

禮部止言恭遇

皇上繼

天立極、景福維新、彝章遞舉、即今山陵襄事、幸學大閤、郊祀籍田、典禮煩重、必寅清之地、主持有人、斯能相帝格

天安神佑民乞

勅尚書臣孫慎行趨朝掌禮以從人望視學擇八月初四日巳而以

先皇在殯郊祀尚未躬承命於來歲舉行

敘○縣○省○平○苗○功○加○恩○張○鶴○鳴○等○有○差○

命諸䟽題復括取緊要便覽勿允複

此是劉以
全共經略
紀原

經畧尚書熊廷弼疏曰事本難而視之愈易勢已急而應之愈緩着宜先而布之愈后心當同而構之愈異懇乞嚴勅中外臣工各換肺腸真心實意憂國籌邊亟計軍實早圖恢復以救危禍以寬

聖憂何謂事本難而視之愈易賊已猖決極難抵當

國家全力若兵將若糧餉若器械等項盡擲于遼陽今從新計策極難置辦而議者但曰守着三岔河川着西北虜而河西可無事兵馬調若干募若干鱗火雲集可不患寡有帑金新舊餉可無虞匠場火器車營興工製造可戰有具而獨患乏大將一事耳何言之易也

何謂勢已急而應之愈緩。夫賊勢之急固也。即在事諸臣一聞報紛紛守城門。送家眷。請召募。移督撫。豈不皇皇着急之甚。而今忘之矣。調兵則邊鎮發遣無時。募兵則科道起程何日。上兵則路途遙遠難到。錢糧則兵戶爭執不休。器械則工部推諉不管。即臣到部將一月而終日與本堂商議某處該遣官某銀該解發某事該催趙某件該料理勒限新司起草尚多沉閣而他衙門之緩又無論也。何爲着宜先而布之愈後。以遼論則三岔廣寧爲先着以京師論則山海關爲先着以恢復論則廣寧登萊天津三路皆先着。醫家急則治標。一應兵餉戰具宜盡一時財力。

大略

合諸臣精神全用于此。當先緊要之着。此着一定。賊自不能飛越京師。自可安枕。而紛紛留兵募兵築臺濬池。皆以護京師爲名。爭此帑金。四分五裂。及其要做。先着則金已早盡。而莫可措手。又何舛也。

何謂心當同而構之愈異。胡越同舟遇風。而其心必一者。自救也。今中外臣工。于此不但爲君父計。即自爲身家性命計。亦可以同矣。而部堂與部堂異。有司與有司異。屬官與堂官異。小臣與大臣異。議臣與任臣異。省鎮與

廟堂異。文官與武將異。以致請討本急。而阻之以爲異。勞緒未就。而壞之以爲異。事體本定。而變之以爲異。情分本

細觀經略
此說忠義
勃然極怪
人之與人
之私而後
不定言行
之殊耶抑
有所施激
而然耶

諸而挑之以爲異。更有難於校舉者。然而諸臣又非不知
大事之難。勢之急。着之宜先。而心之當同也。祇緣一團自
顧之私意。釗結于胸中。而不能割。各部曰。且顧我衙門。省
鎮曰。且顧我地方。京師曰。且顧我輦轂門戶口。且顧我局
勢。鄉曲曰。且顧我香火。甚至顧體面。顧套數。顧祿位。顧訛
彈。而誰復有一付心腸。爲

皇上顧封疆。顧宗社。明其難務其急。且先以破異同之見
者。此臣願

皇上嚴勅下中外諸臣。各換肺腸。真心實意。憂國籌邊者
此也。然則今日極難極急。而所當同心先圖者。孰有踰於

兵馬糧餉器械事者哉。昨向職方司取募兵數冊子，內調兵共有十一萬三千有奇，除到遼外，尚餘十萬了無着落。募兵十一萬二千，而差官或起程，或未差官，亦了無着落。真所謂紙上兵耳。邊兵向調屢空，無銀解補，邊臣苦之。令宜如某鎮調六若干，通筭安家甲馬器械等銀若干萬兩，先解該銀一面，委該道同見任能將，抽選精壯押送到關。聽臣驗發，不堪者効，一面將銀補伍底，我得應急，彼不落空。前途遇四川調兵科道專望部發銀兩，今尚未解。水西安氏兵應附前科道一人往調，而湖廣土兵恐非空檄所能制也。若募兵於河南、山、陝各處，延山換派有何中用。應

將各巡撫標下精壯及各道練就見兵如數揀發即將所募錢糧聽募補庶彼此俱得實用而南浙抽調之法似亦宜然凡此皆兵部事也乞

勅兵部上緊設處催趨與臣應急如有失悞臣不代咎兵部職兵馬戶部職錢糧往時小小軍費安家等銀兵部權宜協濟豈可據爲成例借今日二十餘萬兵之安家甲馬等銀數百萬兩都要兵部處辦兵部無計只得空文調募各省鎮只得空文搪塞此戶部銷兵法也遼東額餉歲計八十萬今地方亡其大半而十四萬援兵尚存殘兵數萬所餘餉銀何在又半分其帑金何爲者今日之事不但兵

馬在途、缺乏行糧、在遼、缺乏本折、戶部應任其責、即調募夫銀、至悞發遣、亦戶部之責也、乞

勅戶部上緊與兵部通融措處、以便調遣、與臣應急、如有失悞、臣不代任咎、至于大將及偏裨之謀勇敢戰者、委難其人、今臺省皆以登壇爲言、若謂行伍草澤中、見有英雄豪傑、足當韓范之任、而臣不肯用者、臣胸中實無有也、臣入臺僅一月、往按遼四年、南中一年、聽勘里居七年、有何見聞、前次經略平日所識拔、皆已舉用、皆已零落、今亦逢人訪問、而無所得、而臣又不敢輕舉白丁、如許定國、趙勅忠等、驟得游擊、而託故推病、以甚保舉之咎、臣想臺省諸

臣生長兩直十三道或邊或腹凡所謂行伍草澤中英雄豪傑必胸中皆以有其人而非漫然空言責成臣部者乞勅兵部發單分送六科十三道及大小九卿各衙門各舉所知或堪大將或堪偏裨一一疏名付臣隨材使用而有如不肯用不能用者則臺省執筆議其後方屬草未畢忽接撫臣王化貞賊謀愈急我備全踈一揭不覺感嘆歎噓回想去年在遼情景正如是如此而無奈各部之不肯照管何也內言援兵出關者纔一萬七千內惟一千三百堪用餘皆象人塗馬徒滋遼累京運益甲不堪盡置高閣又僅一道一廳無人供事其所呼籲何如其亟亟者二部見

在梅花甲京營長柄斧南京斬馬刀真定新造與薊昌堪
用車輛以及督撫回鎮即發新帶精壯兵馬出關以當應
用來行之疏正與臣前調標下見兵聽自募補之說甚合
兵部俱當如議速復如數給發仍請

天語叮嚀工部京營各省鎮道通融濟急不得執留以致
失誤河西再速剝膚之禍其該道補張應征高邦佐二員
已經命下數日皆避難不往假使人人如此

皇上孤立於上實可寒心吏部吏科當一面查叅責取不
敢失誤供狀之案一面馬上扎催勒限到任違即逮處者
也臣嘗嘆河東之事會縣人情以難爲易以急爲緩以後

誤先以同伐異職略舉四端爲諸臣提心開眼然亦晚矣
清撫之後因仍而有三路三路之後因仍而有開鉄北關
開鉄北關之後因仍而有遼瀋之事今掌大河西其餘有
幾賊特不即過河耳及今立從難處急處先處同處下手
倣去而勢已過重時已難返若再因循不改舊套臣有不
忍逆觀者臣言懸直雖冒一時不敢犯之譴實冲數年不
可破之病尤願諸臣恕之也

遣御史蘇述巡茶陝西

經略熊廷弼請添設監軍諸司併保繫臣高出

上命部院議復

禮臣上言比者

大婚典禮皆奉

神廟昭妃頒諭舉行至遴選教習碑厥心力以至選定
三宮並皆賢淑上承

宗祧下慰人心其勞績詎謬少哉宜有殊恩異數以答
昭妃。

上命該部擬奏

上以貢途壅滯當酌爲疏通恩貢命照

皇考例再考一次歲貢照舊行

南科徐憲卿條上入

觀事宜免

朝之數當寬

多留節良撫我周敵

糾擾之罰當重

自衛卿力

冊科民

違限之法當嚴

往來水程稽查議處

至于署篆之人速當議

定

擇取鄰邑郡佐之有品望者

署印之考速當議行

既有考成

咸知

候賜

上諭內閣茲今二十三日恭遇

聖母禋服之期朕率三宮躬詣南城宜春宮几筵前行祭

奠禮况路徑窄狹擁擠不便所有侍直園子手等項免行

扈衛文武百官俟朕還宮畢方進行禮卿等傳示各衙門

遵行特諭

廣東主考改工部主事曾櫻以時迫途遙請寬場期

停御史張捷俸以劾輔臣才庸手辣也

降原任監軍高出二級胡嘉棟四級戴罪立功

禁抄傳私書揭

雲南道李日宣題爲天潢之后宜賓

其意良欲
其見亦達

至聖之后須達其略曰臣惟一代之興主必有一番乘勢
更新之規模使人心踴躍而思奮而一代之大典必有一
番隨時補救之創制使人心痛快而改觀今年

龍飛天啓正文明蔚起之初科場條陳之會於凡正文體
遵傳註慎房考議較閱嚴關節種種要件爲諸臣所已言
者臣不敢贅臣惟自幼習東魯聖人之條而世沐

高皇帝造士之恩。有慨於中者久矣。當此

聖明在御。敢不披衷以請。如天潢之派。不必遠引。即在江
右。名藩華胄。隆隆維城。夙儒奇美。彬彬滿服。每遇督學歲
較。時有冠塲。但至棘闈榜開。人盡黜額。豈皆氣數使然。亦
緣資格難破改。將來士鄙

宗學人閤

國憲游惰日長。憍恣相尋。臣竊憂之。嘗于宗祿一事。切自
揣議。將軍以差無過限。祿一法。中尉以差無過力。田興學
一法。欲學之興。無過加額貢舉一法。則計宗室中尉而下。
有志進取者。亦既讀卧碑之文。騁虞門之步矣。茫茫仕路。

恢恢天網何可復作羈縻學士之術絕鼓舞英雄之路
記自河南戊午之外此道絕响則循江西而湖廣山東山
西陝西四川等處政可做之以行而又未可以此隘本省
之途也請自今始於凡宗生有科舉至二十名以上者許
於本省加額中式一名以示亢宗盛意但一登賢書即止
歲祿如鄉里貢舉行當不侈口黃屋借途青衿即從此登
第授秩一如吏部考核斥陟法不得于會典外別有引例
妄行請乞如是則

宗室既不患于倚馬雕龍之無以自見而

國家亦且幸樹駿流鴻之不失其親於以興起來學澄清

流俗所切

宗政良非小補至東魯後裔則係先聖熙運 國家文治
又非如尋常千里一士云者乃堂堂孔學自曲阜世家與
明經歲荐之外僅見戊午鵲起耳豈洙泗留餘第堪絃歌
百里而鄒魯啓後不待禮樂三千耶臣往過齊魯之封每
問先師後裔不云振起無法則稱遺佚多才臣每扼腕
籌畫臨風浩嘆計惟有加額選舉之一路切謂每歲大比
孔廟宗學中才學兼優者應自不乏

朝廷當明示作興之意於省額中式外加舉一二人以攸
崇

聖學。蓋不徒經明行修之有功，後來開風以興起，亦且星布棊列在位，到處薰德而善良，其爲

大聖人錫光百世，豈有旣與？宗室合計江西等省，不過十人而止耳。

孔學不過一二而止耳，而美風所布文明之治爛焉，使海內人士相向手額曰：

聖天子加惠文學，一舉而親親尊賢，並有光輝如此，其誰不爭相奮競以自效于明時乎？即令夷虜聞之，亦曰：

新朝舉動若此，吾曹未可逞者矣，其所關係國運政體不旣多與？

皇上倘不以臣言爲謬、乞

勅下禮部速議具伏、以光天啓元年新政、則

高皇帝與各聖在天之靈、實式臨之、非止臣區區一人之私臆也、臣不揣愚昧、激切叩聞、

上曰、宗生聖裔、中式名數、各加于額外、勿拘定人數、致滋多礙。

聖恩同量

上諭內閣、朕覽奉聖夫人客氏面奏、屢辭出去、是朕留爾等有何權賄、勿生猜疑、爾侍朕勤苦、撫勞有年、且歷代皇祖俱有聖母保護、今朕尚在冲齡、三宮年幼、時賴調護、爾辭待

皇考妣梓宮發引神主回京奉安畢擇日出卿等傳示各衙門不得紛紜竇擾特諭

兵科給事蔡思充奏曰比者臺臣傳宗龍募有新兵五千名俱健壯堪戰又總兵楊愈茂召有新兵三千餘名中願出關者不下七八百名宜令經臣委司官一員再行挑選務期精銳安家銀照援兵原例并衣甲器械如數給發蓋選擇既精不讓秦晉之銳卒豈其索之數千里之外而顧遺之目前西兵之札營于通州者三千名雖曰入衛中豈無投石超距志存立功者宜令道臣周起元諭以急公之義欣以破格之賞棟其勇往者或一千或一千五百令隨

排選出
之兵

西華集卷之六

六

出關俟兵少集掣回通州者則於入衛之約束不與議用
監軍道胡嘉棟領有毛兵八百名今札天津毛兵易野驢
驅豈習水性並宜領赴榆關聽經臣指揮者也兵食罷甲
隸在三部者有侍郎王在晉總理司官三員分任似綽乎
有餘臣之所慮部分而法不盡行議多而事不盡實故才
品不相遠稽其心力之勤情敏鈍難懸斷察其報完之遲
速至于甲罷之態雖在月破亦在節省蓋月破則委之近
波節省而不堪用亦付塵土須任怨耐煩着着親行樊寶
乃塞總理李報吏部紀錄以示激勸庶指臂可聯貫也抑
臣尤有說焉經臣空拳而出其瞻瞻反顧在三部接應而

請旨全資
廣寧

三部頻眉相視在錢糧不敷爲

國家所全者大伏乞

皇上爲社稷計再發帑金二百萬總頻太僕寺不許三部
拍分一切調兵製器聽經臣計費派用咨行總理分司督
催專應廣寧之急庶有濟乎職草疏將完接總兵劉渠報
奴集馬步達賊二十萬于本月二十五日祭旗在獐駝站
會齊要犯擒廣寧不當危於累卵急於燃眉伏乞

皇上卽面召經臣賜與尚方并符驗旂牌諭令即日啓行
仍諭三部大臣日夕拮据无遲時刻如兵食足器械精而
成美无策罪在經臣如兵單食缺甲薄器鈍罪在各部臣

謹以糾劾隨其旨

皇上有破格之恩。必有不測之罰。彼時身名俱繫。勿謂職

激切爲至
之論真錄
石也

今日不言也。伏乞

勅下兵部。卽爲議復施行。

七月庚辰

孟秋享

太廟遣國公張惟賢詣

定陵告祭

皇祖

嚴禁匿名文書

降原任按察使高出爲山西副使廣寧監軍

准覆試舉人張世偉照常會試

才品最優
浮論頗息

棘園搜卷議

議曰主必搜者慮致遺珠主不搜者慮開別竇不若各
房考各盡心目于本房之卷而以搜卷歸之主考于定

榜之前一日主司會各房一室信手公派同坐公間以防遺佚各房更不許私自互搜。以免嫌疑。庶幾無弊。遼東西路監軍參政邢慎言中路監軍副使錢士晉南路監軍副使梁之垣天津監軍僉事胡嘉棟登萊監軍廉使楊述程。

遼東巡撫王化貞奏曰奴之謀犯廣寧非一日矣。盛甲器械船隻挨牌俱已齊備。據回鄉報稱只在六月盡七月初分兩路入寇。又報稱要從黃泥窪直趨廣寧。只怕兩達子殺截。又稱奴酋欲待九月後各叛將說趁今廣寧兵馬未集。容易成功。今抄花所報果于張義站會兵以二十五日上馬矣。其遣人于宰賽處所借放宰賽爲名。以要西虜并

兵馬器械
到底不能
應手奈何
哉

惟絕略出
關

覘之耳抄花雖與我合然劫于奴之積威各部未集不敢
逆奴顏行奴之西行誰其禦之出關之兵聯絡河上若不
足恃黃泥窪一路至少亦須三萬臣屢

請不得招集遼兵近二萬皆須馬匹甲仗臣屢

請不得除工部先發者俱不堪用近

請堅好甲仗又未知何時發至原議在驢馱送至遼今皆
及關而返關外驛遍疲累運送不前即臣欲待而奴不能
待也若兩路並進臣豈能翦紙爲兵以禦之哉伏乞

皇上勅下該部速催援兵及甲仗馬足星夜進發以濟急
用并催熊廷弼速行出關調度蓋奴與李永芳之所畏者

惟廷弼一聞其出關必趑趄而不敢進兵亦不敢逗遛中外同心協濟而遼猶可爲也。

禮部傳奉

聖旨奉聖夫人客氏准照

皇祖戴聖夫人余氏例伊男加升錦衣衛指揮伊夫照子贈官給與誥命

御史劉蘭等公疏竊惟國家有隆施之恩使恩靳于禮之內則恩薄而禮亦未愜亦有一定之禮使禮濫于恩之外則禮失而恩亦不暢故恩與禮宜兼盡情與義宜相當則今之議待奉聖夫人客氏是也方

皇上初登寶位，怙恃無親，孤特獨立，危疑相伏。外廷諸臣所以悉心推衛者，不遺餘力；領內而保護

聖躬，趨侍左右者，惟客氏是賴。大小臣工莫不慶

祖宗社稷之靈，推客氏調護之功矣。今幸冠禮久成，吉典游臻，釐降之儀肇舉，關雎之慶方新。則宮庭之內有

皇上主持于上，

中宮佐贊于內，足以侍朝夕而奉起居。清嚴之地，似亦無所容。客氏住足，客氏之當就外宅也明矣。聞

皇祖大婚之後，保姆即令出宮，則舊例不可不循也。客氏即云勤慎，顧

馬客氏謀
更九餘地
矣

恩禮所重權勢歸之則嫌疑不可不避也傳聞客氏但欲
資財饒富一切身外名利俱係常物則止足不可不知也
其家已膺錦衣之榮其秩亦隆夫人之號辭報既已滿足
臣子何敢言功則還遜不可不早也夫客氏有保護大功
諸臣何得不爲崇重願恩以禮拘情緣例格應如科臣之
請

皇上優以金帛大賜賞賚使之生有所養老有所歸即令
勿戀內廷出就外第悠游家食之樂早離權勢之嫌常
守富貴之榮永無是非之及令人重其功稱其德則
皇上之大有造于客氏客氏受

燒而異醒
而切詳疏
中之極佳
者

恩更無量矣。諸臣合辭以請其出
宮者。欲以保全其功也。無任激切。

通州報宣大調兵省遁數百人。

上命巡撫王國禎設法招回。仍行經過地方緝解。欽首正
軍法。領兵官一體重治。

大學士韓爌以黔捷傳恩。具疏辭。不允。復上言曰。臣備員
綸扉。軍國之事。時亦與聞。疆場之虞。屬方引罪。乃至苗功
叙賚。歲月_{可謂風}。不惟稽之典章。又不任受而亦且叅之
名實。辭無可辭。頃_臣祇述初終。未與之詳。以俟。

聖明無私之鑒。乃

妙

宸聰未回、褒綸再渙、諭以恩典具在、不復問其差殊、勉以
成命、宜遵、未蒙察其衷悃、感茲
隆睭、愈以徊徨、夫

皇上天也、而恩施雨露也、膏潤沾濡、何能自外、然亦必有
根○茅○之○萌○而○後○可○以○爲○栽○培○之○地○而○臣當軍興之始、未經
小○草○之○出○山、暨凱奏之時、尤爲株守之閑、老功非所及居
之○其○何○以○爲○名○心○所○難○安○辭○之○亦○非○以○明○讓、臣是以躊躇
無措、跼蹐靡寧、無可更端、祇申前懇、伏望

皇上俯垂鑒照、丞裁偶誤之恩、俾協輿評、庶免自欺之罪、
感荷知遇、榮逾

寵私矣。

上諭兵部朕念經畧尚書熊廷弼特磨新簡奉

命專征安重事權兼隆禮數專勅各賜勅書一道尚方劍
一口將士不用命者副總兵以下先斬後奏兵餉額解經
費外特發帑金以佐軍需且起行有日賜大紅麒麟一品
服紵絲四表禮銀四十兩仍賜宴都城外五府戎政部院
堂上掌印官陪錢其隨行領兵將官紵絲一表禮銀二十
兩下各軍每名銀二兩卽于前領帑金內領發卿部可傳
諭行

經畧熊廷弼請精練京營選鋒

祭龍極矣
何以圖報

上曰卿行標下需兵營軍選鋒久經訓練當有紀律聽卿會同總協分揀各官併廩糧優厚等事俱如議俟兵到標下補足各軍仍撤還京營以實禁旅陳良弼素得軍心者一同加意選發不得以攝事自諉

京營協理李宗延言練兵不如恤兵

應天典試諭德黃炳儒黃立極

從經畧熊廷弼請傳國以原官駐廣寧理新餉

御史董翼孔廟追祀議

議曰竊惟古今道德之極莫盛于孔子矣古今隆重之典亦莫盛于孔廟矣而議禮之朝不類聚訟之日常禁二千年來竟有所廢缺而不備者直為我世廟而始漸舉之略聖祠之祀叔紱紱是也九十年來

尚有所疎畧而未周者又將待我

皇上而始備舉之啓聖祠之不獨祀叔梁紇是也粵自

漢高帝迄宋初何代何君不知有孔子哉而牲帛溫號

止及孔子之身未及孔子之先也世官世爵下逮其所

出也叔梁紇齊國之封自大中祥符始而名稱徒具典

禮無聞乃我

太祖開天國子宋濂言之矣而兵戎倥傯未暇舉行

孝宗嗣服侍講程敏政言之矣而甲乙紛囂竟成寢閣

肅皇帝禮樂中興方用輔臣張璵議

詔立啓聖祠祀叔梁紇配享從祀濟濟一堂豈不稱殷

禮哉惟是二臣建議不緣尊奉孔子起見原為顏曾思

孟坐堂上父不應坐廡下據子雖齊聖不先父食之禮

求所以安處點鯉無由但得叔梁紇一祀可以配諸賢

便可通祀典之窮而叔梁紇以前尚當有為孔子崇報

者不暇計矣張璵稱引是說遂亦無所推廣致令

世宗隆禮孔廟之典尤未大備殊為缺然夫國家之事

孔子無不至矣獨是加恩所自僅及其父進之而伯夏

又進之而防叔俱泯泯無聞不得享封崇之榮與樽俎

之列臣實傷之臣謂防叔伯夏合照叔梁紇一體追封

奉祀壇宇無用別營第就啓聖祠做同堂與室之例增

設二龕以防叔處中伯夏處左叔梁紇處右或並稱啓聖公而以世次別之可也或並稱公而以世次別之可也或並稱公而酌定二謚以別于啓聖可也此禮舉而孔子父子祖孫並荷恩綸並食國祭孔子在天之靈庶幾用慰而朝廷之崇報孔子又寧有缺畧而不周至者乎或曰孔子之報與天無極尤當以十世享之而臣不以爲然也孔子稱周公成文武之德追王惟太王王季文王豈以素王而敢踰耶司馬遷叙孔子世家亦斷自防叔伯夏爲始則議孔子而至防叔伯夏亦無容見少矣武又曰一切祀典必求其所表監防叔伯夏無所著于春秋于禮何居而臣又不以爲然也羽淵之血不可以配天乎孟氏之激公室又安知視防叔伯夏爲何似也且顏曾思孟大賢矣而視孔子則遠矣周程朱蔡大儒矣而視孔子則又遠矣彼且以其父配孔氏而享從孔子而祀而孔子配享僅一啓聖而止無所加于諸賢諸儒何無等也不可解矣聖明推恩四品以下上及一世三品而上適有增加何秩然也聖賢分量豈齊豫位崇卑乃推恩祀典也聖賢而無所軒輊不可解矣臣子一沾品位

恩寵榮施三世何優渥也而啓聖祠之封爵准獻祖以上不與焉豈

至聖先師反出祿傳下耶尤不可解矣爲孔子暢

尊祖敬宗之心爲萬古仲綱常倫理之報非

皇上尊師重道之首務耶抑臣尤有說焉獎爲孔子遠

祖光所使爲司徒敷五教而遜五品者此萬世教化之

宗也孔子道統所自來也視稼穡之稷穀養關先並垂

永賴應與功臣祭典以湯武之故不便配享遂前設而

不祀何耶臣載按大魏禮契以后稷配春官光兩有事

焉而明倫如堦教化所助獨無處與明禋之末何草草

也臣謂

帝王廟傍宜有一祠別祀稷契如謂稷已與配別祀所

着一辨又不宜有祠請

昭闕里爲之祭丁于分官致奠如啓聖祠禮則功臣祭

典之缺補塞而無滲漏而聖學淵源亦不至減沒而無

聞矣方今軍旅合皇豈不得迂謏俎豆乃

聖作昌期正典禮修明之日而臨雍在述環橋人士觀

聽

新天子禮樂行且雲集臣敢無說而處此耶伏乞

勅下該部集議具覆舉行

曠典臣不勝
激切之至

禮部侍郎周如盤纂修 玉牒

戶科叅定稽查錢糧法

凡省直之額解俱屬于餉司各邊鎮之年例俱發于太倉出納之事原自井然惟是解到之日既照省分而隸之于東司及轉發之日復照鎮地而承之他司卽十三司中已自錯綜不一矣至于餉司查餉止據其所解之數不復稽其完欠而太倉發銀亦止據其所出之數無憑問其源流此中外所以相蒙出入所以不相照而冊籍徒具永無清楚之期也先是本科都給事周 條請查盤已奉

旨又巡視御史周某悉索該部十三司應解太倉之銀按其故籍而理其舊額覈底查等可謂洞悉其窳矣今本科給事阮某又擬爲庫司合部之議每月以朔望令各司自相審對則于省直之入數可以通查而于邊鎮之出數毫無稽覈其法與巡視相濟均引繩批銀懸案可行者總之外解之弊詭巧萬端更須責令各省直于

解文內明關係某年某項該銀共若干通解則開全完未完則開實欠每解一次俱如此開載則數目分明一覽盡

如矣

廷杖建言爲民原任禮部祠祭司主事盧洪春男生貢盧懋升上言先臣首匡

國本

覃恩遍及遺忠懇乞

聖明俯宏卹錄以風臣節以光泉壤

吏科參看得盧洪春一片忠丹滿腔葵赤初疏抑寵幸嚴立長立愛之防再疏憤起居廕必躬必親之慮致逢聖怒首被廷杖迄今讀其疏想見其爲人其意氣何烈而光景抑何慘也九死餘生千秋間氣倘老成尚在自當曳履千筵裾乃天心暫遣可無蒙恩垂泉壤所應查例優卹以慰幽忠于既往以鼓臣義

于將來
者也

大學士沈淮上言乘時因地小試

上曰卿召募材勇捐貲獎率前來具見爲國忠猷朕心嘉
尚收管訓練授職統領及糧餉等事該部作速議覆
兵科酌議豫備援兵協濟驛遞之法

夫援兵之惡其擾也必設其處地而後援者可飛馳
之恤其疲也必額外補湊而後疲者可避顧不設誠亟
行亦立視其擾與疲耳通州以東援兵輻輳之路未有
師行路處而不突入民房未有豺狼入室而不肆行奸
掠者亦未有拘常數而可望驅遞支應者至于沿途逃
竄一望無烟鉄鍋委填三月不運則民生國事兩者俱
蹙矣故經過地方嚴棚不備水火不周罪在州縣聽院
道參處倘嚴棚滿而故擾民居罪在兵將庶其實者兵
臬示而將糾打其最衝驅遞量給新餉于援遠大馬一
款另行造報州縣正官仍不時查核無使驅遞因以窮

詳見得法
之在奉行
之有如何

也

原任長蘆運同丘雲崖憤逆奴之猖獗敬陳破虜十策

一曰定車戰行則布八門以爲陣止則環周匝以爲營
車之上設鉄籬以捍矢石下設鉄梯以衛人足賊來接
吉門而索戰賊退奏凱捷而歸營胡馬雖健我之鉄車
勢若連城我得制敵敵不能制我士卒可持以無恐矣
一曰設地雷其法坊于諸葛亮我
朝威繼光倣而行之胡人畏懼不敢犯邊塞今誠于賊
之來路預置火砲數十埋于地中陰以竹竿去其中落
以穿引藥線寇至則遠懸藥之線頭以潛通地雷一發
則震天撼地而敵之人馬碎滅無迹我再以鉄騎及之
敗其前鋒彼氣自奪可遂破也
一曰立迭陣每戰以長鎗居前坐不得起次最強弓次
最強弩跪膝以待次神臂弓約賊相離百步則神臂先
發七十步則強弓并發次陣如之則見陣以拒馬爲限
鉄鈎相連俟其傷則更待之遇更待以鼓爲號騎兩翼
以蔽于前陣成而騎退爲迭陣人心若是更番迭射賊
兵銳不能當矣
一曰用之以破兀朮此與車戰相爲表裏

可以愚衆
虜不可以
愚奴否何
也以叛人
爲嚮導以
遣人爲前
驅大都不
能阻即臨
亦必我遂
之於獨耳
○毒河水
可秘用不
可毛傳可
備用不可
常試
○此火攻
之程
所製賊之
車馬亦可

者也

一日掘陷坑、奴之來也、偵探必先知之、可于要路、夜率
諸軍潛掘長坑、深丈餘、愈深愈寬、愈妙、以竿浮搭其上、
又以薄沙土掩之、使不見坑迹、我列陣于坑之兩邊、來
則虛發弓箭、神鎗以誘之、引入坑內、齊以大礮及之、以
弓弩神鎗射打之、昔年榆林趙可曾用之以破套虜者
也、

一日、毒河水、蓋奴賊之所恃者馬力耳、其來也、未有不
經由子河、而能飛渡者、我預置毒藥、毒藥于上流、使奴
賊人馬飲之、不死即病、安能耀武揚威、與我戰乎、奈人
置毒于涇、以敗晉軍、劉錡置毒于穎、以捷順昌、古人曾
有行舟矣、

一日用火攻、令慣戰軍兵于長鎗鈞戟、牢拴烟火之大
者、于鎗頭、兵刃既接、烟火齊發、亂刺亂燒、一層盡一層
繼之、再條關爆于火箭之上、遠射賊之大隊、中以驚潰
其馬、撓亂其陣、

一日用機軍、聞遼東平原易地、輪轂易行、預使木工造
兩輪、兵車數十輛、安置火炮于前、一砲可藏數砲、點運
一機、使徑自推入賊營、砲石亂打、打畢復回、安砲再打
打畢又回、不用人而車能往返運轉、畫一虎以潰其

馬、夜豎一人以駭其軍、奴賊必俱為神兵而逃矣、
一曰用、陷板于木板、上偏鑿大孔、如碗之形、于賊人出
沒之處、密密捱去、止可二寸、不必用深、橫鋪此板于中
留小小土基、以閣板、其卜孔、裁布蒙之、偏撒沙上、于木
板之上、暗留一線之路、使我輕騎潛引至此、再以惡言
詆之、奴必逐兵前來、馬一湧而不收、齊照其足、于孔
內、奴賊引頸待誅矣、

一口用夾攻、朝鮮為東藩、第其兵力微弱、不足仗、以制
奴之死命耳、臣以為命一驍勇上將、將數千精兵、浮海
至于朝鮮西境、扼奴酋之後、以撓亂之、多帶餼糧、勿擾
藩國、我廣寧之軍、以無恐、赫虛聲、揚言一路取開原、一
路取鉄嶺、一路取遼陽、潘陽、使奴瞻前顧後、疲于奔命、
俟其左支右吾之、不暇、然後以戰車前進、以奇兵佐之、
步步為營、見可而進、奴眾必棄去、城廓而護家門矣、
以上十策、以車戰迭陣為正、以地雷八事為奇、當用正
則用正、有金城鉄桶之形、當用奇則用奇、有神出鬼沒
之計、又百計以撓之、多方以破之、至于募間諜、招猛士、
選大將、練卒伍、兵家自有成法、無待臣言、且兵有玄機、
心有妙用、全在臨時斟酌、難以預言、伏祈

建言
國本所宜
贈恤者

兩朝從作錄

卷之七

三

皇上勅下兵部會議如許非之微可採芻蕘之見可詢將臣十策轉行遼東經畧大臣相機而行則一得之愚其于恢復全遼之大計未必無小補矣

南臺御史王允成論司寇黃克績定鄭穩山盜內寶一案生歿不同又罪焦源溥正綱常一疏刺謬特甚

原任刑科給事中已故王如堅男恩貢生王立極上言先臣回天計早忤

旨罪危懇乞

聖明考事核疏俯加

恤錄以光盛典以慰忠魂

按王如堅嘉萬曆十四年進士辦事工部時疏救主事盧洪春等不報尋授懷慶府推官茹蔬飲水治河賑荒

辛若六年節經首荐二十年七月行取本年十二月授
刑科給事旋抗言天下墮蔽大害并陳防奸切要事宜
指中貴與故相交通芻切深根固蒂幾罹不測幸
神祖聖明疏竟留中二十一年二月一十六日禮部接
出

聖諭三皇子欲暫一并封王以待將來有嫡立嫡無嫡
立長時輔臣王錫爵新從宗起揭內有萬不得已必欲
推行等語舉

朝錯愕驚顧咋舌如堅夜即草疏上其略曰臣等連捧
綸音其以

元子冊立于二十一年舉行天下臣民喁喁翹俟近于
本月二十六日有并封待嫡之

旨臣始而疑既而信終而駭
陛下言猶在耳豈忘之耶前日已明之

音。

陛下尚不能自堅今日猶豫之

甚羣臣將何所取信耶且如立嫡之條

祖訓爲戒并嫡者也今日有嫡可并乎無嫡可并乎少
遲之語

陛下爲待中宮者也果真有所待乎抑非真有所待

乎。

陛下援

祖訓為據。人咸為假。

祖訓為符。天下之見。

陛下體中宮為心。人咸為假。中宮以息天下之疑。

執狐疑而來。諛賊持不斷而開羣枉。此幾微之際。不可

不慎也。願

陛下早定大策。毋立

皇長子。正名東宮。皇三子。皇五子。分封大藩。長幼

有序。儲藩有體。名正而言順。言順而事成。等語。二十八

日奉

聖諭。已有旨了。王如堅這廝。還臆修報。巧伺疑君。惑亂

祖法。好生可惡。正是奸臣。本當依例處斬。姑從輕着革

了職。發極邊永遠充軍。該部知道。欽此。是日輓救疏十

餘上

聖怒愈益甚。已而輔臣密揭認罪申救。

聖意稍解。二十九日內閣接出

聖諭。昨發戍王如堅姑着為民。兄戍不許朦朧推用。是

時

元良幾為之動搖。中外幾為之惑亂。盈廷雖共見其隱

移場期的
監奠二議
存之以備
一時權宜
之舉

禍先臣獨首發其大端嗣是雷霆漸霽封議中寢
神祖雖陽加斥逐而陰已採其狂愚矣

禮部題爲襄典屆期京闈當議舊制順天府鄉試八月初
九十二十五三場二十七以後揭曉恭照

皇考妣擇吉日于八月二十七日發引前期三日百官禮
當哭臨若鄉試仍循舊制則闈中諸臣既不得哭泣之列
而吉服將事于禮不稱于心不安順天府揭擬暫改八月
初六頭場初九二場十二末場似可賓典早竣孝誠稍展
矣謹用具題伏乞

聖裁

禮部上言禮因人情而生然非天子不議

神宗顯皇帝
皇上因心創制。每祭情理以拆衷酌古準今。務會節文而
立極矧恭查

神宗顯皇帝

孝端顯皇后同日發引。啓奠祖奠皆先

皇祖考而後

皇祖妣及靈駕進發。宮車後隨至午門內。梓宮升大昇
舉行遣奠禮夫

神宗顯皇帝梓宮。原在乾清宮。

孝端顯皇后梓宮。原在坤寧宮。相隔不遠。故可更番告奠
今

光宗貞皇帝梓宮奉安仁智殿

孝和皇太后梓宮奉安宜春宮若先往啓奠復往祖奠不但煩勞

聖駕抑且恐悞吉時況宜春宮在東華門外

皇妣梓宮無從外入內之禮

皇考 皇妣梓宮升舉亦無一內一外之禮似應先請

皇妣几筵行啓奠禮啓奠既撤即行祖奠禮奉起 梓宮從

闕左門出至午門外升大昇舉然後詣

皇考几筵行啓奠祖奠禮奉起梓宮亦至午門外升大昇

舉正禮謂堊先輕而後重

皇妣先出以候

皇考則禮順而心安且

中宮皇后以下隨

皇考梓宮出行遣奠禮畢便可還宮亦不至久需挨次若
遣奠該午門外較之昨年在午門內者僅遠咫尺亦仰體
皇上大孝多送幾步即哀慕之誠多盡一分矣伏祈
聖明速賜詳察庶便進呈儀注通行恪遵也

遼東卹賚御史方震儒河六不足恃遼十有可乘疏曰臣
于前月十二日至山海關撫慰川兵甫竣事而河西儼

兵未必
生家而
不足

報適至因思

飛身未到
境中親自
度量一番
口中筆上
想不可換
故持論者
不可不審
重也

皇上軫念危疆不惜精金錦綺專遣臣以激勵將士不乘
奴欲渡之時鼓舞更待何時是以星夜馳至河上臣竊意
長河天塹奴雖有不逞之心豈能飛渡我猶得從容聯絡
豫催兵將徐爲戰守計迨臣身到究其源探其廣隘始不
覺淫淫汗下不已臣前有條陳遼事之疏欲河上多置營
房爲久住之計蓋屢敗皆因浪戰此何等時節敢輕言進
取又輕信道路之言謂天限東西河真足恃蓋臣今日而
始知其爲夢語矣河寬不七十步盈盈一水一葦可航全
不見有驚濤怒浪河之不足恃者一也聞奴斬木爲排上

浮以土而用多人推之即使巨津猶如平地況投鞭可斷河之不足恃者二也此河視代子河不甚相遠奴酋公然渡代子河矣我兵一十三萬不敢發一矢放一砲且今守河之卒不滿二萬欲望其半渡而過之豈有是乎河之不足恃者三也沿河一百六十里築城則不能列柵則無用且工程浩大未見敵而先自渡河之不足恃者四也我之地可修守而最冲淺之處如黃泥窪張又站者皆虜地也我即欲修守而不得河之不足恃者五也轉眼水合遂成平地即稀稀防守猶得五十萬人請問此兵從何處措辦河之不足恃者六也信如是也遂將半塊殘遼拱手而聽

奴之蚕食乎。是又不然。我以退爲守。則守不固。我以進爲
守。則守有餘。我以河爲界。則士氣已頽。我以撫順。奴巢
爲界。則人心自奮。況天亡奴。奴自亡。種種景象。又有顯
而足據乎。何者。據老寨中聲息不得通。今奴酋住遼陽。一
動一靜。皆可與聞。一可圖也。奴得我大砲無筭。昨以之擊
我。連皆碎裂。神器不爲之用。天心可知。二可圖也。奴父子
兄弟八人。各將二千五百人。其中不無相傾相軋。即如近
日殺郎萬言之事。父子尚有異同。兄弟且有矛盾。三可圖
也。遼陽之民。盼望官兵。如饑兒望乳。而痛哭慘動天地。奴
誅之不勝誅。防之不勝防。舟中皆敵國。四可圖也。曩者奴

兵常專聚一處故鋒不可當今既守南衛矣守屯堡矣修海州城矣又沿河設防矣兵分力薄五可圖也奴得叛將雖多自李永芳一二人外未必人人效歿首丘之念人皆有之但怕歿而劫于威耳我一舉事勢必響應六可圖也川虜一着雖不足靠然畧足以制奴近日載遼陽金銀首飾三車餽送西虜猶不足得其歡心唇亡齒寒虜亦被撫臣點動七可圖也李永芳攻韓宗功而中彈金鉛子留骨間天誅叛賊之証已見八可圖也奴賊淫人之妻奸人之女廣寧在剝膚恨入骨髓土著之民人人爲身家計尤可圖也奴聞舊經畧時至沉吟久之而撫臣胆智真是經

臣幫手文武同心天假其便十可圖也。或者曰以劉綎之智杜松之勇也而敗之瀋陽之堅甲利兵也而敗之今日兵力未齊瘡痍未復乃作孟浪之言少年之事其以廣寧爲孤注乎不知臣非敢浪言戰也正以深言守耳。蓋深見遼陽不復廣寧無站脚處榆關一線豈足以鎖薊門哉。此非臣喜事之言而墮淚之言也。我日日講渡河而究竟不能若靠定三岔作家恐事異時異人皆聞鼓聲而奔走天下事不知其所終矣。伏乞

皇上念據河無守法亦無長住之法。益思河旣無守不得

不以將兵爲險。不得不以乘機遘會爲險。不得不以一制

聲援爲險。速催兵將。早早出關。嚴兵以待。相時決機。若過却。八月九月。大事已去。至于萬全。而後動。撫臣已深慮。而熟計之。萬萬不敢倉皇。僨猿蹈。馬上催戰之覆轍。以增皇上東顧之憂也。臣草疏甫完。竟見奴兵已大集河上。從西寧堡望之。真如鐵壁銀山。而守河之兵。衣甲器械全無。惟有空拳以當百口已耳。事急矣。撫臣之望兵望將。望盛甲器械。眼血而心枯矣。惟

聖明速行該部覆題請施行。

經畧熊廷弼題用原任主事劉國縉起升登萊招練副使。佟卜年升登萊監軍僉事。推官洪敷教升職方主事。經畧

軍前贊書

中嚴曠弛之罰凡借差到任愆期者計水程議處

順天監臨御史李凌雲吳應琦

兵科蔡思充條議武試及期宜清夙弊以羅真才謂策論

濫套當汰馬上武藝當較武經訓誡當明邊塞要害當講

水戰攻擊當預

慶陵工報竣

出田詔劉朝劉忠陳應科于獄降爲奉御外家閑住

降太監王安爲淨軍看守南海子皆舖

南兵主事何棟如陳水火二軍

是時有使

前科武舉

二十名之

歲

成

事句一

何謂火軍車戰是也臣聞奴酋有精兵四萬人馬皆披全甲馬首兩旁皆夾長鎗對陣衝來我軍非搶倒即箭射死毋怪其屢入得志也臣于神宗朝曾上請纓一疏已言中國之長技在火與車矣而邊將寡謀惟知弓馬以我所短攻彼所長安能取勝且從古出塞破虜未有不用車戰者若製得武剛大車偏輻小車各一千五百輛大小銃砲數千位結為三陣鼓行而前則虜不能衝突我軍既有所恃而無恐箭縱能及遠我軍又有所蔽而無害于是從容以鏡砲擊之遠者可打十里近者亦不下數百步更番迭換夜以繼日人馬俱碎營寨可燒此與以弓馬敵弓馬利害何啻天淵倘火軍不煉與弓馬同倘假臣便宜召募知火器之人不論何方何勞但以慣習為主自擇知火攻之將統領而練訓之則火器非常一發難禦計虜兵十萬可一戰盡也此破虜之一奇也

何謂水軍海船是也臣聞奴酋新寨三面皆水一面阻山我軍縱得勝長驅卒未易下且虜空國獨當一面分兵擊之則不敵合兵圍之則不能是自遺之擒也昔廣東總兵王鳴鶴與臣講究海運良法謂宜詔海上貿易資財可千百以上者官五民三勿令太重官照時給價

即誌經略
三方布置
意

私免其抽兌之堅固即百倍于造載止八分又無患
于漂搖其船上領受非千人之英即萬人之保其與水
手無不臂力過人武藝精強若以船之大小多寡為原
自稍把以至參游皆給空頭劄付有功者定授又主之
以副經畧統之以大將佐之以督餉監軍道如漕運故
事則人樂為用不惟
朝廷百萬金錢且為
朝廷練就數萬水兵誠百世之永利也臣通見遼東轉
餉多買舊船希圖省事所招皆亡命無賴之徒船與人
不相宜人與海不相習以致漂沒運舡數十艘積米四
萬石可為寒心以臣愚見淮揚登萊之間添設一副經
畧衙門召募大海船三百隻名為轉餉實則寓兵與遼
陽經畧互為聲援一同進剿虜必空國迎敵臣率水兵
直搗其寨破其巢穴則進無所利退無所歸成禽必矣
此破虜之
又一奇也

兵部接出

聖諭朕惟薊遼屏衛京師前為九邊重鎮尚書王象乾以

孫思賢啟
曠紀千古

本兵行邊佳、麾前鎮行、總督事、責任事、權並重、體統禮致、
空優一切事宜、具勅書中、除諸鎮額供并召募新餉、急爲
督發外、仍給帑金十萬兩、以佐軍需、賜大紅蟒服一襲、紵
絲四表裏、白金四十兩、仍賜宴、兵部各部院掌印官陪餞、
以寵其行、該部可傳諭各衙門遵行

經畧熊廷弼請申明經撫職掌

上曰、經撫職掌雖分各兼軍務、三鎮撫臣除大開竅處與
經畧商求濟妥、其本鎮應行事務隨宜專制、不得諉卸以
重責成

韓王助餉二千五百兩

上嘉其忠義

起用原任延綏總兵蕭如勲到京面

恩賜酒飯

原任遼東巡撫薛國用病故

大學士葉向高奏曰臣自被

命後已以病苦真情懇切控辭未蒙矜允隨復具疏申
請忽聞遼陽陷沒中外倉皇遂不敢不發今于五月二十
九日該禮部差官賫捧

聖諭催臣入朝臣方僵臥山中扶曳匍匐望

闕叩謝于六月初九日力疾就道念臣一介書生素無才

望往事

皇祖時際太平得以雍容奉職然其碌碌無能猥狃不堪
固已昭然其曉于天下矣况當此艱難危困之日加疾病
垂危之軀豈有分毫足濟緩急惟是臣子情義不能忽然
俟至受命之候

可以視

皇上視其庸駑困憊之狀必悔于召臣而諸臣之望臣

至者亦將自咎其失言矣臣聞定傾危戡禍亂全在人才

今羣賢濟濟畢集輦下諸所爲保全封疆剪滅逆酋

之計固已犁然畢具而撫臣王化貞條議鑒鑒神間氣定

足當闡外之寄是在廟堂之上專其委任而重其事權

有金任工
核兵餉

有請必應有應必速。遼事尚可辦也。至于兵餉缺乏。
皇上慨發帑金而戒其冒破。神謨淵盡。切中窾會。
見

皇祖開礦權稅銖積寸累。受盡煩言。竊疑

聰明神聖之主。富有四海。何爲若此。繇今觀之。殆若逆知
天下之有變而預爲

聖子神孫計者。往有言五行之類。金爲兵屬。今大內金氣
太盛。恐將召兵。
臣深以爲然。時舉以告

皇祖。然則

皇上之發帑。非但成

皇祖之德意或亦弭兵之一道也從來天下之財未有積而不散者而散之善者常多保封疆安社稷省徵求之苦結萬姓之歡消內歛而固根本其爲吉祥善事孰有過于此者此臣之所以深爲

皇上喜也倘內帑不足則如前

詔書所列上供物料量行折價俟事平復故似愈于別項之搜括耳惟是目前所急尤在將才唐之亂平于李郭宋之難禦以韓岳皆武流也今天下之大豈可謂盡無若人誠宜精其選而重其任假以便安優其爵賞使之有翹然自喜于功名之心而作其委靡退縮之氣似亦攀拘之所

卜相須急
牙聖

八字是和
奏保太
顯領

當破者若 綸扉政本何不存本安危所關今雖

簡用多賢而以臣為之首孤裘羔袖深恐非宜謂宜俯從

言官之請亟行推擇不拘內外衙門但有夙望足以鎮物

宏猷足以濟變者即行擢用與兄在諸臣協心併力謀斷

相資其勝于老病之庸臣不萬倍乎臣愚昧之人素無籌

策萬里遙度自知無當然耿耿一念不能自已又身病途

遙未能旦夕逮到

闕下恐一旦顛沛道途卒填溝壑長負

恩私故敢恭報起程而附陳其愚衷如此以備

聖明採擇至如愛惜忠賢破除恩怨毋使梧鳳方栖復潔

身而去

國自駒將繫更裹足于畏途此則在廷諸臣當有同心而無待臣愚之饒舌矣

河南道謝文錦請疏言路疏曰臣聞之自非聖人外寧必

有內憂故臣盡臣謀國猶欲釋之以外懼誠以敵國外患何

代蔑有而惟是有法家拂士圖維于內者最兢兢焉我

皇上睿齡初茂聖智日開用人快于拔茅納諫迅如流水

雖古關門訪落何以加茲故前者奴賊聯陷駸駸飲馬于

河破竹之勢銳不可當征兵無兵遣將無將甲馬器械無

一足恃而所恃者獨

此等議論
實所以重
君相非謂
其言路也
臣已也

皇上盛德景福爲

帝心所仁愛

祖宗所鑒臨臣民所向注而又如天之度靡物不容若谷之懷無言不納集羣策以謀之糾羣力以圖之蕩平固自有其日耳乃邇來諸臣感憤時事深憂過計奏牘沓至紛紜議論豈能脗合雖人人言殊而一點忠

君愛國捍圉滅賊之念以

臣

度之誰敢爲異誰恐自欺

皇上初欲鎮定器爭不得已姑示裁抑而不善體念者遂疑

皇上之厭薄言官也而有意旁猜者又轉疑相臣之假靈

皇上箝言官之口而擅其重也夫

朝廷設官各有職掌試問六科十三道所職何事若徒取充位不欲其有言則于職掌何若耶

朝廷亦何爲以有制之祿而養此無所事事之官爲也從來

聖帝明王建鼓懸鐸招之使言未聞監訪防口而以言爲諱也臣固知

皇上決無此意也相臣平章軍國治亂安危于焉樞紐吐握旣切驕吝自消姬公所以成其聖諸有忠慮于國但勤攻吾之闕則武侯所以爲相天下者法也臣又知相臣慮

必及此也、且

神祖末年、雖不用言官之身、而實用言官之言、故言路重、而莫敢有竊權壅蔽者、至今愈服

皇祖之神、即輔臣方從哲當國以來、不難以身爲闇汶之
數、未嘗處一言官以自快其私、至今而服舊輔之饒有相
度也、臣屢繹

明綸爲戶部請帑內云、即此遼餉查核一事、何曾有一人
悉心調畫、抗章指陳、又爲遼東撫臣催兵馬器械、切責兵
部該司內云、此等緊重事情、科道官何不指名奏處、是
皇上于言官何嘗不責之以言、而言路諸臣、亦何敢不言

自溺其職哉。第公車章滿積日累時。然嘔心而陳者。竟吐餘而棄之矣。責之以言。無所逃罪。責之以瀆。授責之以逞。臆快私。又無所逃罪。爲言者。不亦難乎。將憚逆鱗之批懷。投鼠之忌。則榮華易悴。眉耳難施。將指橫堦之軼。埋當道之輪則。

霆震海加。弱羽易折。勢必顛直者獲譴。以行而滑捷者望風而附。巧伺意旨。傾擠忠良。臣竊爲言路慮也。而亦爲相臣慮。宰相位冠百寮。所與爭可否。而司糾駁者。獨有諫官。是諫官雖卑。與宰相埒。假令諫官不得其言也。誰爲爭而誰爲糾者。操縱自如。而愛憎隨意。同己者庸異己者去。百

讀至此相
臣當不寒
而慄

官奉命惟謹。可以爲所欲爲。而果其有益國家。無愧衾影。夫亦何憾。但恐祗實善借。結大癘噬。迨至悞國家。誤身名。始悔爲諸子所誤。噬臍何及。況

皇上聰明天縱。穎慧性成。從此博洽古今。練習庶務。一旦豁然貫通。追思從前

詔旨何者爲

宸衷所親裁。何者爲閣臣所票擬。慶賞刑威。或僭或濫。果睿斷之不可挽回。抑閣臣之不爲補救。彼時邇初政之得失。與宰執之貞邪。稍有差池。定難回護。福不盈背。禍溢于世。

歷朝覆轍良爲炯鑑。臣故爲相臣慮也而更爲主德慮。

人君以優容狂直爲聖宰相以輔養

君德爲賢今

皇上璞玉渾金未瑤未琢生機方長善端可充抑折必諫豈迂儒之陳談艱難使知正老成之長慮縱或起居少節喜怒失調措置偶乖刑賞無度相臣不能得之格心者庶幾諫官得之顯諍方今罰調降削不啻土芥而相臣竟莫爲調護似乎用意摧殘但喪其敢言之氣者夫以爵祿還朝廷以角巾返初服士安往不得貧賤而獨是諫官不得

名言

印句道著
智者見其
幾信然

行其言宰相必不得行其道試想不冠不見爲汲黯乎爲
公孫弘乎鷄死懷中爲魏徵乎爲房玄齡乎又試播引燭
焚詔長有此擔當否檄責弄臣長有此作用否銜憲握符
而內不可問借鼓煬竈而外不敢言自是諸臣媚子稱萬
年之觴溢志慙心窮長夜之樂恣其意之所適惟其言而
莫違以可堯可舜之資而不收明言達聰之益少成若性
積漸使然匡弼無能轉移何術臣故爲
主德慮也夫

皇上睿聖達天動客中禮自非習染能移然而周游罔淫
不邇不殖雖

明聖不忘儆戒則臣雖慮所不必亦其不妨于過慮者相
臣而慮及此也縱不爲言官計獨不自爲計乎縱不自爲
計獨不爲

主德計乎况當今之時水旱頻仍災祲亦迭見賦役張而
不弛法令弛而不張盜賊公行于

馬侍御
起亦深
之

輦轂逃兵肆掠于村屯窺關艸澤之微時聞土潰瓦解之
形立見流民之圖阻而莫上破柱之威格而難行將奮挺
大呼聞閭偏于夷狄而嘉言結舌且以爲鼠竊狗偷而不
足憂也此之慮慮在民心又况奴酋愈張我疆日蹙將卒
怯于公戰糧餉匱于私廩法立曾莫其知威惠施未必見德

行間隊伍豈皆奮擊之雄調募貔貅猶是嶺梅之望且戰
守緩急尚無成謀欲用機權未聞實著倘虜騎飛渡烽火
達于甘泉而危言虛喝且留之司馬門不一即上也此之
慮慮在邊事諸凡種種可慮摠繇言路不通

皇上豈虛懷以求之霽色以承之尤懼人不敢盡言也不
得聞過也而況乎士直厭之譴責隨之也哉說者曰

皇上非厭言也厭夫言之不當者乎夫人各有知有不知
見各有到有不到如必吐詞爲經則咨牧之朝何以有都
兪吁咈之象是在可者採用之不可者姑茹納之勿以冒
觸

威嚴爲忌。勿以指摘當路爲嫌者。唐太宗謂公卿曰。人欲自見其形。必資明鏡。若欲自知其過。必待忠言。若苟復諫。自賢其臣。阿諛順旨。若旣失國。臣豈能獨全。又謂執政曰。朕嘗恐因喜怒妄行賞罰。故欲公等極諫。公等亦宜受人諫。不可以已之所欲惡人違之。苟自不能受諫。安能諫人。太宗中主耳。不但已肯受諫。又欲執政受諫。故貞觀之治。照耀史冊。豈以

皇上流唐漂虞。陋太宗不足爲者。乃遜此而未遑耶。抑臣因是而有感焉。言路之通塞。天下之大利害也。然必人主重言官之言。而後言爲天下重。亦必言官自重其言。

而後能爲

人主重彼其議興議革百年之利病攸關。脩止脩行。四海
之凜承恐後。寧先事而斟酌其宜。毋事後而二三其說。則
論事不可不重。片語敲推。頃滅班行之色。一言獎借。頃生
岩谷之春。袒稍分于左右。衡即倚于重輕。則論人不可不
重。臣願諸臣以天下國家之心。就人而論人。而東西南北
勿問。以天下國家之見。就事而論事。而爾我異同勿問。以
藏身之恕。而求人非人。以勿欺之信。而爲直爲諷。庶乎不
媿屋漏。可對大廷言之能爲。

人主重天下重者。端必繇此。臣不敢不與諸臣共勉之。伏

惟

皇上曠天地之量。采葑菲之微。孫宥狂愚。以疏通言路。使民生休戚。邊事安危。無日不陳于前。而

朝廷威福。臣庶陟斥。無人敢竊其柄。更望輔臣。恢張休度。捐除成心。藉他山之石。增玉鉉之溫。隨事以開陳。迎機而挽救。務俾降削諸臣。併還舊秩。毋令潞公專美于前。則相道光。

主德懋。傳之四海。播之四夷。皆知法家拂士。居內折衝。言路之氣壯。而逆賊之膽寒。內治修。而外患靖矣。